

**ՀՀ ԱԶԳԱՅԻՆ ՏԵՂԵԿԱՏՎԱԿԱՆ ԱՆՎՏԱՆԳՈՒԹՅԱՆ ՍՊԱՌՆԱԼԻՔՆԵՐԻ
ԳՆԱՀԱՏՄԱՆ ՄԱԿԱՐԴԱԿՆԵՐՆ ՈՒ ԴՐԱՆՑ ԿԱՆԽՄԱՆ
ՌԱԶՄԱՎԱՐՈՒԹՅՈՒՆՆԵՐԸ**

**Արթուր Աթանեսյան
Քաղաքական գիտությունների թեկնածու,
ԵՊՀ Սոցիոլոգիայի ամբիոնի դոցենտ**

ՀՀ ազգային տեղեկատվական անվտանգության հիմնախնդիրների քննարկումն ու դրանց հնարավոր լուծումների մշակումը (ցավոք, մի շարք հարցերում ուշացած և ոչ մասնագիտական, հաճախ՝ զուտ ձևական մակարդակով իրականացվող) խիստ արդիական են: Հաճախ նկատելի է տեղեկատվական անվտանգությամբ զբաղվելու յուրահատուկ «նորաձևություն»: Շատերին թվում է, թե դա «զբաղմունք» է, որը հեշտ է, մասնագիտական գիտելիքներ, տրամաբանություն և փորձ չի պահանջում: Դրա հետևանքով է, որ ՀՀ ազգային տեղեկատվական անվտանգության ապահովման բնագավառում առկա են բազում հիմնախնդիրներ, որոնց հետևանքների զոհն է յուրաքանչյուր հայ: Մեր կողմից ՀՀ ազգային տեղեկատվական անվտանգության վերլուծության երեք մակարդակների առանձնացումն ու սպառնալիքների վերլուծությունը ցույց է տալիս, որ ներպետական ծագում ունեցող սպառնալիքները մեր տեղեկատվական անվտանգությանը պակաս չեն, քան արտաքին սպառնալիքները, ինչը վկայում է մեզանում ազգային տեղեկատվական անվտանգության հանդեպ առնվազն անփույթ վերաբերմունքի մասին:

1. **Ներպետական մակարդակում Հայաստանի և հայ հասարակության տեղեկատվական անվտանգությանն ուղղված սպառնալիքներն են.**
 - Սպառնալիքներ հայերի ազգային ինքնությանը և միասնականությանը
 - Պետության և հասարակության, իշխանության և ընտրողների, բնակչության տարբեր շերտերի միջև համարժեք, դինամիկ և գործառնական հաղորդակցական կապի բացակայությունը
 - Սպառնալիքներ ՀՀ և ԼՂՀ քաղաքացիների սահմանադրական իրավունքներին ինչպես պետության ներսում, այնպես էլ պետությունից դուրս ժամանակավորապես գտնվելու, աշխատելու և սովորելու ընթացքում
 - Կրթական գործընթացների և հատկապես միջնակարգ կրթության բովանդակության որակի մասնագիտական հիմնավորման բացակայությունը
 - Կրթամշակութային քաղաքականության բացակայությունը
 - Ազգային միասնականության բացակայություն մի շարք հարցերի առնչությամբ, որոնք ունեն ռազմավարական նշանակություն ՀՀ, ԼՂՀ և հայ ժողովրդի անվտանգության տեսանկյունից
 - Հայաստանի թույլ և անբավարար քաղաքականությունը՝ հայ հասարակությանը և հայկական սփյուռքին ընդհանրական տեղեկատվական-հաղորդակցական և կրթամշակութային դաշտում միավորելու ուղղությամբ
 - Պետության քաղաքացիների գիտակցության և վարքի ենթարկվածությունը տարաբնույթ տեղեկատվական-քարոզչական շահարկումներին, որոնք ազատորեն իրականացվում են ԶԼՄ-ով և տարածում ազգային արժեքներին սպառնացող հակարժեքներ, վարքի անթույլատրելի, շեղվող և քրեապես պատժելի նորմեր և այլն
 - Պետական քաղաքականության և սեփականության բացակայությունը կապի ոլորտում, արտասահմանյան ընկերությունների կողմից հայաստանյան հեռախոսային շուկայի մենաշնորհումը, պետության կողմից քաղաքացիների շահերի պաշտպանության

բացակայությունը հեռախոսային և ինտերնետային ծառայություններից օգտվելու ոլորտում

- Ջանգվածային հաղորդակցությունների ոլորտում տեղական արտադրանքի ցածր մակարդակն ու անմրցունակությունը, պետական անբավարար վերահսկողությունը մեղիա-շուկայում տեղական և արտասահմանյան արտադրանքի նկատմամբ
- Չհավաստագրված, անորակ համակարգչային արտադրանքի և ծրագրերի օգտագործումը, որոնք խախտում են տեղեկատվական և հաղորդակցական համակարգերի և ցանցերի նորմալ գործառումը:

2. Տարածաշրջանային մակարդակում ՀՀ և ԼՂՀ տեղեկատվական անվտանգության հիմնական սպառնալիքներն են.

- Ադրբեջանի Հանրապետության կողմից ՀՀ և ԼՂՀ անվտանգության խարխլմանն ուղղված, համակարգված և անընդմեջ իրականացվող տեղեկատվական պատերազմը, որի նպատակներից են՝ այլափոխել Հայաստանի և Հայության միջազգային իմիջը, տարածաշրջանում և աշխարհում առաջացնել և ամրապնդել հակահայաստանյան և հակահայկական տրամադրություններ և համապատասխան քաղաքականություն, խթանել դարաբաղյան հակամարտության ադրբեջանամետ լուծումը և այլն
- Թուրքիայի կողմից Հայոց ցեղասպանության իրողության հերքումը տեղեկատվական-քարոզչական հակադրման տարաբնույթ միջոցների կիրառմամբ
- Սպառնալիքներ ՀՀ և ԼՂՀ պետական քաղաքականության տեղեկատվական ապահովմանը
- Սպառնալիքներ հայ ժողովրդի պատմամշակութային ժառանգությանը, հայկական պատմամշակութային հուշարձանների ոչնչացումն ու այլափոխումը տարածաշրջանային պետությունների տարածքում
- Հայաստանի պասիվ մասնակցությունը տարածաշրջանային նախագծերին, որոնք ենթադրում են հաղորդակցական ուղիների և միջոցների հեռանկարային զարգացում:

3. Գլոբալ մակարդակում Հայաստանի և հայ ժողովրդի տեղեկատվական անվտանգության սպառնալիքներից են.

- Սպառնալիքներ հայերի ազգային ինքնությանն այլ պետություններում
- Սպառնալիքներ հայկական սփյուռքի միասնականությանն ու ՀՀ-ի և հայ հասարակության հետ գործառնական կապերին
- Սպառնալիքներ Հայաստանի միջազգային վարկանիշին և կերպարին՝ քաղաքական, տնտեսական, մշակութային, քաղաքակրթական իմաստով
- Սպառնալիքներ՝ ուղղված քաղաքական որոշումների մշակմանն ու իրականացմանը, կապված աշխարհում Հայաստանի դերի ամրապնդման և զարգացման հետ: